

Porro cum Joseph hinc ex recta propagatæ cognationis linea pendeat, illinc ex altera ejusdem cognationis linea Maria descendat; ipse de linea in lineam transitus generationis est mysticæ sacramentum. Nam quia Maria Joseph carne non jungitur, non utraque una est generatio; sed unam Joseph, alteram Maria generationem facit. Plane cum Scripturarum consuetudo non teneat, ut per mulieres cognationis lineam texat, per viros Christi genealogia producitur; in ejus tamen ortu virilis materia non miscetur, ideoque cum ad Joseph perventum est, successionis ordo non ulterius in inferiora deducitur, sed per transversum protinus, et ex latere in virginem derivatur. Sic post carnales generationes fit generatio spiritualis, ut mox sequatur res inaudita prorsus, et singularis. Spiritualis siquidem generatione fit de Joseph in Mariam, singularis de Maria in Christum.

## CAPUT III.

*Quomodo Ozias genitus a Joram dicatur.*

Sed dicas mihi, quisquis es, quomodo inter Joseph et Mariam potest generatio dici, quam videlicet ipse non genuit? Et tu mihi reciproca consuluis inquisitione responde: Cur idem beatus evangelista Matthæus, de cuius nunc sententia disputamus, ait inter cætera: « Joram genuit Oziam (Matth. 1); » cum nequaquam sit pater Oziæ, sed potius Ochoziæ? Quisquis enim quarti libri Regum percurrit historiam, indubitanter agnoscit, quia Joram genuit Ochoziam, Ochozias genuit Joas, Joas genuit Amasiam, Amasias genuit Oziam, qui et aliò nomine dicitur Azarias (IV Reg. VIII). Cur igitur Joram non Ochoziam, dicitur genuisse quem genuit; sed potius Oziam, qui jam procul ab illo quintus absistit? Si ergo inter Joram et Oziam esse generatio dicitur, non quod Ozias ab Joram sit genitus, **196** sed quod ab illo per longam continui generis traducem sit productus; quid prohibet inter Mariam et Joseph, qui procul dubio consanguinei sunt, generationem dici per quamdam scilicet vim et mysterium sacramenti? Et si comprehendendi non potest, quomodo Christus ex virgine nascitur; quid mirum si

A inter parentes ejus stependa quedam et admirabilis generatio videatur, cuius videlicet et generatio singularis, et conceptio nova; et nativitas comprehenditur inaudita? Hæc tamen dicimus salva auctoritate sanctorum doctorum, quos superius memoravimus.

Ut igitur ad ea quæ cœpimus post diverticulum revertamur, in hac generatione Domini non illa conspicitor regula suis servata, quam videlicet alibi praediximus, ut in supputandis generationibus una provideatur superesse personæ: quæ scilicet si illi servaretur, una adhuc addenda persona necessario videretur. In illa quippe cognationum linea trifaria dinumeratione digesta, uniuscujusque tesserae quatuordecim tantummodo sunt personæ, sicut et generationes. Nec generationum numerum personarum multitudo videtur exceedere, dum nil aliud ibi generationes, quam simplices sint personæ.

Consideranti itaque, et rem diligentius perpendenti patenter occurrit, quod B. evangelista dinumerando cognationis regulam, quam praediximus, non modo non tenuit, sed et caute vitavit, studiose contempsit, prudenter exclusit. Nam cum in genealogia Domini, certi causa mysterii trifario dispositionis ordine quatuordecim decrevisset generationes attenere, ut unamquamque personam generationem esse monstraret, tres quos superius diximus, Ochoziam videlicet, Joas et Amasiam, de narrationis ordine reges abjecit: et tot personas apponere, quot generationes enumerare contentus fuit. Plane cum sibi personarum multitudo suppeteret, noluit ut persona generationibus superesset; sed ut generationum, ac personarum sibi invicem numerus æqualiter conveniret. Hæc itaque, venerande frater, et ipse pervigil mediare, et cum sapientibus tuis stade conferre, ut aliorum mihi fultus auxilio, certum quid valeas respondere. Rescribe igitur, si in supputandis parentæ gradibus, vel in eo perseverare debeam, quod ante descripsi; vel usuppare potius quod nuper inveni, ut dum a te mihi multis onerosa dubietas tollitur, a multis tibi per me digna gratiarum actio referatur.

*Sit nomen Domini benedictum.*

## 197-198 OPUSCULUM NONUM.

### DE ELEEMOSYNA. AD MAINARDUM EPISCOPUM URBINATI.

**ARGUMENTUM.** — Præ cæteris virtutibus eleemosynam potissimum commendat, in cuius laudes hoc Opusculo vir sanctus eloquentiae laxat habenas, et omnes ingenii sui vites effundit.

Domino MAINARDO Urbinati venerandæ sanctitatis episcopo, PETRUS peccator monachus salutem in Domino.

Qui sub aestivo meridiatur umbraculo, et tunc in prælio non laborat, et tamen non incongrue de præ-

D liis disputat. Non otiose quiescimus, si quiescendo de labore tractamus. Quo scilicet ordine vel dulcior fructus, vel seracior valeat exuberante proventus. Qui regia diversatur in curia, cunctas virium suorum dotes explorat, si quid est unde principalibus oculis

placere plurimum riteat, et in quo su reperit amplius posse, ibi se satagit enixius exercere. Alius siquidem robustior est in bello, alius prudentior in consilio. Ille dum perorat causas, luculenter ac lepidè concionatur in publico; iste dum hunc æquare facundiæ urbanitate non possit, dictandi forte studio, vel etiam aucupio, sive certe venationis arte præcellit; et ut ad nostra veniamus, ait Moyses filii Israel: « Separate apud vos primicias Domino: omnis voluntarius et proni animi, offerat eas Domino, aurum, argentum, æs, hyacinthum et purpuram, coccumque bis tinctum, et byssum, pilos caprarum, et pelles arictum, ligna sethim, et oleum ad luminaria concinnanda (*Exod. xxxv*). » Quæ nimirum, quia omnes omnia non habebant, obtulit unusquisque quod potuit, et in ea re largior fuit, quæ sibimet, exuberantius abundavit, ut dum omnes offerrent quod singuli non haberent, unum multi Domino tabernaculum fabricarent. Nos etiam, qui nunc in hujus vitæ deserto tabernaculum constituimus, ut ingressi terram lacet mel manantem, in illa cœlesti Jerusalem templum sub veri Salomonis imperio dedicemus: quod nimirum non sit ex insensibilibus quibusque metallis, sed ex lapidibus vivis; et non decusatur rutilantium nitore gemmarum, sed spirituallum radiat decorum virtutum. Omnium quidem bonorum Deo largiente, steri participes possumus, omnia vero possidere æqualiter non valemus. Nam et sancti Patres, qui nos ad coelestia præcesserunt, licet omnium virtutum ex divina fuerint opitulatione participes, non tamen in omnibus existisse creduntur æquales. Abraham siquidem cæteris fide simul et obedientia præfuit; Isaac nitida monogamiae castitas decoravit; « Moyses, sicut ait Scriptura, vir mitissimus erat super omnes homines qui morabantur in terra (*Gen. xv*); Eliam libertatis auctoritas reddit insignem (*Num. xii*); Phinees zeli servor, et ultiō jure perpetuo constituit in conspectu Domini sacerdotem (*Num. xxv*); Joannem ad recubitum Dominici pectoris virginitas exulit (*Joan. xiii*); Petrum vero præcipuus amor in Dominum ad percipienda primi pastoris jura provexit (*Joan. xxi*).

## CAPUT PRIMUM.

*Quod ex virtutibus una eligenda, - cui magis serviamus.*

Quamvis ergo unusquisque sanctus omnibus florere virtutibus necessario debeat (neque enim singularia quæque vere virtus est, si mixta aliis virtutibus non est) una tamen virtus cuique est præ cæteris eligenda, cui mēns familiarius inhærendo deserviat, atque ab ejus, ut ita loquar, obsequio non recedat. In cunctis quippe virtutibus æque nos exercere non possumus, sed dum unam arctius custodimus, in hac, quod ex reliquis minus est, adimplemus; et dum hanc indesinenter amplectendo constringimus, quasi totum virtutum corpus unius membra participatione tenemus.

Quam itaque virtutem tibi persuadeo peculiarius

A exsequendam? Nunquid jejunium? Sed continuo respondebis: Si immoderatis corpus meum jejunis attero, imminentibus tot causarum discursionumque laboribus mox succumbo. Si psalmodiæ meditationes indixeris, ab 199 orationis, inquietes, assiduitate præpedior, quoniam ad respondendum salutationibus amicorum, ac miscenda colloquia quotidie coactus impellor. Si nudis te, juxta morem apostolorum, pedibus hortor incedere; si duris, instar Joannis, membra tua ciliciis edomare; si denique te in exsilium proficisci; si carcerali custodia te jubeam pœnitentium puro concludi, imminentem præsto causaberis ægitudinem, vel potius non te posse perferrre tam duram corporalis incommodi gravitatem.

B Qui ergo membra tui corporis adhuc times affligerem, imo quia temelipsum per acrimoniam pœnitentiæ neandum vales Deo sacrificium exhibere, ad ea, quæso, quæ circa te sunt, manum porrige, et quia non te, saltem quæ tua sunt, impetrare: carner scilicet incisurus, satis tibi præsto, si tantum capillos attondeo; qui manus obtruncator adveneras, pius est, si unguum duntaxat excrementa præcidat. Quantum distat inter vulnus humanæ carnis et vestis, tantum inter hominem et hominis facultatem. Hoc modo Abraham pecus obtulit (*Gen. xxii*) ut filium conservaret, mactavit arietem ut custodiret hæredem. Ille modo Michol posuit in lecto simulaecrum ut a paternæ vesaniæ gladiis defenderet virum (*I Reg. xix*): et ut Dayid veraciter viveret, quasi morientem cum caprina studuit pellucula simulare: « Pellem enim pro pelle, et cuncta quæ habet homo dabit pro anima sua (*Job ii*). » Tu quoque temelipsum propria facultate permuta, et tua fac interim sacrificium, ut ipse postmodum suscipi mercaris in holocaustum. Non enim Deus sic accipit oblationem, ut despiciat offerentem: ut qui suæ facultatis oblator extiterit, secura cum uxore Manue valeat voce cantare: « Si Dominus, inquit, nos vellet occidere, de manibus nostris holocausta et libamenta non suscepisset (*Judic. xiii*). » Suscipientem Deus per manus pauperis eleemosynam, eamque tibi reconitam in illa cœlestis promptuarii securitate conservat. Unde Dominus in Evangelio: « Thesaurizate, inquit, vobis thesauros in cœlo, ubi neque ærugo, neque linea demolitur; et ubi fures non effodiunt, nec surantur (*Matth. xvi*). » Idecirco plane Deus omnipotens alios paupertate constringit, alios divitiarum copia dilatavit, ut ei illi habeant unde propria debeant peccata redimere, et isti unde suam valeant inopiam sustentare. Sicut scriptum est: « Redemptio animæ viri, divitiae suæ (*Prov. xiii*). » Unde ei ad Nabuchodonosor ait Daniel: « Quamobrem, rex, consilium meum placeat tibi, et peccata tua eleemosynis redime, et iniquitates tuas misericordis pauperum, si forsitan ignoscat Deus delictis tuis (*Dan. iv*). »

C Qui ergo divites sunt, dispensatores positis jubentur esse, quam possessores: et non proprij juris,

D

Gelent deputare quod habent, quia non ad hœ bona transitoria perceperunt, ut deliciis affluant, vel in proprios hæc usus insumant, sed ut administratio-  
nis fungantur officio, dum in commisso permanent villicatu. Quapropter qui stipem pauperibus erogant, aliena reddunt, non sua distribuunt. Unde et Dominus cleemosynam præcepturus ait : « Attendite ne justitiam vestram faciatis coram hominibus, ut videamini ab eis (*Matth. vi*). » Non enim dicit, misericordiam vestram, sed justitiam vestram. Ille quippe facit **200** misericordiam, qui propriæ tribuit; ille vero justitiam facit, qui quod alienum est, reddit. Unde et Psalmista cum præmisisset : « Dispersit; dedit pauperibus; » non ait, misericordia ejus, sed, « Justitia, inquit, ejus manet in sæculum sæculi (*Psal. cxi*). »

Cum ergo pauperibus subvenimus, aliena procul dubio reddimus, non nostra præbemus. Verumtamen apud pium judicem misericordes esse deceinimur, cum hæc ipsa, quæ non nostra, sed communia sunt, fideliter dispensanius : et cum justæ, quæ aliena sunt, reddimus, apud eum qui cordis intima conspicit, misericordiæ præmio non caremus. At contra, qui nunc pauperibus subvenire contemnunt, in tremendæ discussionis examine non tam accusantur avaritiae quam rapinæ : nec suorum tenaces sed alienorum potius convineuntur fuisse raptoreſ. Quibus utique summus arbiter dicturus est in judicio : « Discedite a me, maledicti, in ignem æternum, qui paratus est diabolo et angelis ejus. Esurivi enim, et non dedistis mihi manducare; sitihi, et non dedistis mihi bibere (*Matth. xxv*). » Ac si dicat : quia noluisti ea ministrare conservis, quæ pro illorum refrigerio perceperisti, voraci gehennæ vos olla deglutiat, quos per cupiditatis ardorem alienorum bonorum rapina condemnat. Et cum alienum a nobis sit, quod in hac vita dispensandum suscepimus; nostra vero sit cœlestis gloria, quam speramus, competenter his illa sententia congruit, quam Dominus in Evangelio dicit : « Qui in alieno fideles non fuisti, quod vestrum est quis dabit vobis? » (*Luc. xvi*.) Ille certe fidelis in alienis extiterat, qui de se consideranter aiebat : « Benedictio perituri super me veniebat, et eorū viduæ consolatris sum : oculus fui cæco, et pes claudio; pater eram pauperum (*Job xxix*). »

O quam fidelis in alienis extiterat, et quam firma spe de propriis considere poterat, cum et alibi se denotando clamabat : « Si negavi, inquit, quod volebant, pauperibus, et oculos viduæ exspectare feci; si comedi buccellam meā solus, et non comedit pupillus ex ea; quia ab infantia mea crevit mecum misericordia; et de utero matris meæ egressa est mecum (*Job xxxi*). » Ubi adhuc apte subjungit : « Si despexi prætereuntem eo quod non habuerit indumentum, et absque operimento pauperem; si non benedixerint mihi latera ejus, et de velleribus ovium mearum calefactus est (*Ibid.*). » Vide quam longus sit misericordiarum iste catalogus, ut nil

A propterea omittat, quin omnium necessitatum modis occurrat, enenī egestatum vulneribus velut mendendo subveniat.

Porro autem dum indigentibus in necessitate succurrimus, veritatem simul et misericordiam adimplimus. Misericordiam scilicet, dum inopibus pie compatimur; veritatem vero, id est justitiam, dum non illis nostra, sed quæ sua sunt, ministramus. Hinc est quod in Proverbiorum libro Salomon ait : « Misericordia et veritas non te deserant: circumda eas gutturi tuo, et describe in tabulis cordis tui, et invenies gratiam et disciplinam bonam coram Deo et hominibus (*Prov. iii*). » Rursumque scriptum est : « Misericordia et veritas præparant bona; in omni opere bono erit abundantia (*Prov. xiv*). » Et ne pietatis

B **201** opus segnities ignava depreciet, sed devotio celeris ac prompta commendet, alibi dicit : « Ne dicas amicō tuo, vade et revertere, et cras dabo tibi, cum statim possis dare (*Prov. iii*). » Tremen enim manus avari cum tribuit : et sicut æger exhorrens amarescentis antidoti differt poculum, sic iste daturus aliquid differt in posterum. Ille siquidem exasperantis potus nauseat amaritudinem; iste si dederit aliquid metuit egestatem : ideoque licet vel in bibendo, vel in præbendo necessitatis tempus immineat, uterque tamen in posterum quod abhorret, interjecta dilatione reservat. Plane largus et liberalis animus facit divitem, pavor atque tenacia reddit egentem. Unde scriptum est : « Substantia divitis urbs fortitudinis, pavor pauperum egestas eorum (*Prov. x*). » Pavor enim degenerem autimum compellit egere, licet divitiarum copiis videatur affluere.

## CAPUT II.

### *Eleemosynæ præmium quodnam sit.*

Tu autem, dilectissime, noli fratrem tuum in præsenti necessitate despicere, si Deum tibi desideras in ultimæ necessitatis articulo subvenire : « Beati siquidem misericordes, quoniam ipsi misericordiam consequentur (*Matth. v*). » Porro si dederis homini pecuniam tuam in senus, centesimam recipis : si vero pauperibus, secundum divina mandata centuplum consequeris : quod si hoc parum videtur, et vita tibi cumulatur æterna. Non ergo melius est te recipere centuplum quam centesima esse contentum? Noli ergo despicere proximum, si non vis Deo despabilis apparere. Unde et Salomon ait : « Qui despicit proximum suum, peccat; qui autem miseretur pauperi, beatus erit (*Prov. xiv*). » Ubi mox additur : « Qui credit in Domino misericordiam diligit (*Ibid.*). » Plane si is qui credit in Domino misericordiam diligit, dicendus est ille non credere, qui convincitur misericordiam non amare: Cur autem iste non credat, alia ejusdem libri sententia declarat; ait enim : « Feneratur Deo qui miseretur pauperi, et vicissitudinem suam reddet ei. »

D Non itaque credit in Domino, qui sua sibi timet bona committere, dum ea non vult indigentibus exhibere. Nam si in Domino veraciter crederet, fenerari sibi tanquam fidei scilicet debitori facultatis suæ

depositum non timeret : de cuius autem si de qui A centuplum (*Gen. xxvi*). » Sed quam felicius seminas, dubitat, eum procul dubio non honorat; cum scriptum sit: « Honora Dominum de tua substantia (*Prov. iii*). » Et alias dicitur: « Qui calumniatur egentem, exprobatur factori ejus: honorat autem eum qui miseretur pauperi (*Prov. xiv*). » Et iterum: « Facere misericordiam et judicium, magis placet Deo quam victimae (*Prov. xxi*). » Eleemosynarius enim quisque misericordiam facit, dum indigentibus in necessitate compatitur; judicium vero, dum eis non propria, sed eorum bona largitur. Sed ex his dum alienam in praesenti sustentat inopiam, æternas sibi in futuro divitias parat. Unde scriptum est: « Qui dat pauperi non indigebit: qui despiciit deprecantem, sustinebit penuriam (*Prov. xxviii*). » Déponit enim dives quod indigentibus tribuit, et nunc B quasi mutuae 202 pecuniae depositum credit, quod in æterna vita multiplicatis senoribus recipit. Et qui nunc sit per misericordiam creditor, in retributione postmodum felix erit exactor. Unde scriptum est: « Pauper et creditor obviaverunt sibi, utriusque illuminator est Dominus (*Prov. xxix*). » Et de muliere forti, per quam vel sancta universalis Ecclesia, vel unquamque fidelis et pia intelligitur anima, in Proverbiis dicitur: « Manum suam aperuit inopi, et palmas suas extendit ad pauperem (*Prov. xxxi*); » ubi mox apte subjungitur: « Non timebit donum suæ a frigore nivis; omnes enim domestici ejus vestiti sunt duplicibus (*Ibid.*). » Quisquis enim nunc operimento geminæ charitatis induitur, tanquam dupli veste contextus nequaquam futurae nivis frigore constrin- C getur: et quem nunc charitatis ardor inflamat, tunc pœnalis algorem nivis ignorat. De qua videlicet nive futuri supplicii, et per B. Job de reprobo viro dicitur: « Ad nimium calorem transeat ab aquis nivium, et usque ad inferos peccatum illius, obli- scatur ejus misericordia (*Job. xxiv*). » Dignum quippe est ut qui in hac vita per ardorem concupiscere carnalis exarsit, a calore vero misericordiae frigidus et constrictus obtorpidus, illic ad calorem nimium transeat ab aquis nivium; ut sicut hic duabus delinquit offensis, ita geminis crucietur in gehenna suppliciis: et illic ejus versa vice misericordiae obli- scatur, qui nequaquam hic misericordiae memor exstiisse convincitur. Præmitte ergo tibi, frater, opes tuas, unde postmodum vivas; præcedant te facultates tuæ, quas in illa semper immortalitate possideas. Memento quod scriptum est: « Dives cum dormierit, nihil secum auferet: aperiet oculos suos, et nihil inveniet; apprehendet eum quasi aqua inopia, nocte opprimet eum tempestas (*Job. xxvii*). »

Placeat ergo tibi consilium, quod per Salomonem datur: « Mille, inquit, panem tuum super transientes aquas, quia post multa tempora recipies illum: da per te septem, necnon et octo, quia ignoras quid mali futurum sit super terram (*Eccle. xi*). » Et iterum: « Mane semina semen tuum, et vesperne casset manus tuas (*Ibid.*) » Legitur in Genesi: « Quia sevit Isaac in Gerara, et invenit in ipso anno

A centuplum (*Gen. xxvi*). » Sed quam felicius seminas, qui dum subsidia indigentibus subministrat, pro avena triticum, pro pugillo chorūm, pro grano metit acervum: terrenis plane cœlestia, transitoris merentur æterna. Dicit Scriptura: « Quis potest dicere: Mundum est cor meum, purus sum a peccato (*Prov. xx*); » quis enim gloriabitur castum se habere cert? Sed eleemosynis solerter insiste, et mundum te ex divina pietate confide. Unde Salvator: « Quod superest, inquit, date eleemosynam, et ecce omnia munda sunt vobis (*Luc. xi*). » Sicut enim ardor ignium metalli cujuscunquè rubiginem, sic eleemosyna consuevit animæ purgare squalorem. Unde et vir sapiens: « Ignem, ait, ardente exstinguit aqua, et eleemosyna resistit peccatis (*Eccle. iii*); » ubi præsto subjungit: « Et Deus prospector est ejus, qui reddet gratiam, meminit in posterum, et in tempore casus sui inveniet firmamentum (*Eccle.*). » Deinde subjicit: « Fili, eleemosynam pauperis ne fraudes, et oculos tuos ne transvertas a paupere (*Ibid. iv*). » Et rursus: « Animam esurientem 203 ne despexeris, et non exasperes pauperem in inopia sua. Cor inopis ne afflixeris, et non pertrahas datum angustanti (*Ibid.*). » Et multa alia, quæ vir iste propheticus de præroganda pauperibus pietate contexit: et Evangelio necdum illucescente, tanquam sacerdos in Ecclesia prolixi sermonis seriem protrahit: quæ nos hic omnia simul exaggeranda non ducimus, ne fastidium legentibus generemus.

### CAPUT III.

#### *Quænam eleemosyna major sit.*

Sed cum per omnes sacri eloquii paginas eleemosyna prædicetur, et misericordia cœteris virtutibus antecellat, ac palmam inter opera pietatis obtineat: illa tamen misericordia supereminet, quæ de copia nuper ad inopiam devolutis auxilium præbet. Sunt namque nonnulli, quos honestioris quidem generis ordo nobilitat, sed indigentia rei familiaris angustat. Plerique etiam equestris prosapiæ titulis adornantur, sed domesticæ necessitatis inopia deprimuntur: extinge generis dignitate compelluntur spectabilium interesse colloquiis, concessu quidem pariles, longe facultatibus inæquales. Sed licet eos domesticæ paupertatis sollicitudo discruciet, etiam si cogente necessitate ad extrema perveniant, alimenta petere mendicantes ignorant. Eligunt enim potius mori, quam publice mendicare, confunduntur agnosciri, venientur inopiam confiteri: et cum alii suam prædicent egestatem, imo nonnunquam modum exaggerando paupertatis excedant, ut uberioris stipem consolationis accipiunt; isti quo potiuntur, occultando dissimilant, ne turpiter in oculos hominum signum aliquod suæ paupertatis erumpat.

Horum igitur indigentia potius valet intelligi quam videri: magis quibusdam signis erumpentibus conjici, quam manifestis possit indicis deprehendi. De quibus utique non manefeste, sed occulte pauperibus quanta sit retributio. Prophetæ designat, cum ait: « Beatus, qui intelligit super egenum et

paupērem (*Psal. xl.*). » Super pauperes quippe paupēremos et bulgiolos, perasque gestantes, intellectu non indigemus, quos utique manifesta visione conspicimus : super ipsos autem pauperes debemus intrinsecus intelligere, quorum in superficie non possumus miseriam pavidere. « Beatus, enim, qui intelligit super egenum et pauperem ; » et quare beatus ? « In die, inquit, mala liberabit eum Dominus (*Ibid.*). » Felix ista promissio, ut postmodum in divino libereatur examine, qui nunc subvenit indigenibus in mœrore ; tunc a miseria calamitatis eripitur, qui modo miseriam patientibus miseretur.

Sed audiamus adhuc quid Psalmista prosequitur : « Dominus, ait, conservet eum, et vivificet eum, et beatum faciat eum, et emundet in terra animam ejus, et non tradat eum in manus inimici ejus : » Dominus opem ferat illi (*Ibid.*). » O quam gloriose mercatur, qui pro misericordia, quam pauperibus exhibet, totius Christianitatis orationem continuam proferretur ! Omnis enim universalis Ecclesia tuto terrarum orbe diffusa, pro illo Deum quotidie supplicat, 205. quæ videlicet hunc psalmum quotidiana jugiter devotione frequentat. Adde quod haec oratio nunquam in divinæ clementiæ valet definire contemplum, quæ videlicet a Spiritu sancto facta est, qui est ipsa remissio peccatorum. Quo enim pacto orationem a semetipso compositam non admittat ? Quomodo quod orare docuit, non exaudiat ? Beatus ergo, et vere beatus, qui intelligit super egenum et pauperem. Unde Moyses, imo Dominus per Moysen : « Si unus, ait, de fratribus tuis, qui moratur intra portas civitatis tuæ, in terra quam Dominus Deus tuus datus est tibi, ad paupertatem venerit, non obdurabis cor tuum, nec contrahes manum, sed aperies eam pauperi, et dabis mutuum, quo eum indigere prospexeris (*Deut. xv.*). » Et alibi : « Non defrunt pauperes in terra habitationis tuæ, idcirco præcipio tibi, ut aperias manum fratri tuo egeno et pauperi, qui tecum versat in terra (*Ibid.*). » Scit enim omnipotens Deus, quoniam humana fragilitas pro sola sua justitia nūquām pervenire possit ad vitam, sed semper indigere misericordia : atque ideo per omnes sacrarum paginas Scripturarum eleemosynam laudat, misericordiam praedicat, viscera pietatis exhibet pauperibus indesinenter inculcat : ut dum homo hominis miseretur, suis etiam meritis a Deo misericordiam consequatur : et dum sustentat propriæ naturæ consortem, sustentantem se habere mereatur ancorem : et quod exhibet proximo, ipse quoque consequatur a Deo : Sicut enim Conditor hominum et omnes electos ad regnum ab ipsa mundi predestinavit origine, et tamen eos pro ipsius aequatione regni præcepit infatigabiliter desudare, ut quod gratis a Creatore concediur, suis homo laboribus assequatur ; ita necesse est, ut qui per misericordiam a pio sumus auctore salvandi, ipsi quoque piæ humanitatis impendium non negligamus fratibus impetrari. Unde Tobias ad filium : « Ex substantia, inquit, tua fac eleemosynam, et noli avertere fa-

A ciem tuam ab ullo paupere : ita enim sicut ut nece-  
a te avertatur facies Domini (*Tob. iv.*). » Ubi etiam discretionis modum ponit, et authenticam procul du-  
bio regulam in qualibet possessionis atque sub-  
stantiæ quantitate præfigit; ait enim : « Quomodo  
potueris, ita esto misericors ; si multum tibi fuerit,  
abundanter tribue ; si exiguum, etiam exiguum li-  
benter impetrari stude (*Ibid.*). »

Cur autem hoc facere debeat, aperit, cum subjun-  
git : « Præmium enim bonum tibi thesaurizas in die  
necessitatis : quoniam eleemosyna ab omni peccato,  
et a morte liberat, et non patietur animam ire in  
tenebras : fiducia magna erit coram summo Deo ele-  
mosyna, omnibus facientibus eam (*Ibid.*). »

#### CAPUT IV.

*Quod qui eleemosynam vel effectu, vel affectu non  
præstat, charus Deo esse non potest.*

Enimvero ut hujus rei summam brevi complectar eloquio, nunquam Deo charus erit qui vel effectum vel affectum eleemosynæ non habuerit : scilicet ut qui non habet rem, 205 habeat voluntatem : et dum domes-  
ticæ facultatis affluentia non exuberat, liberalis ani-  
mis divitias non amittat. Nam qui non habet cibum,  
habet forsitan tectum ? non valet esurientem alimente  
rescere, valet saltem lassescerentem hospitalis huma-  
nitatis officio recreare. Memorans semper illud apo-  
stolicum : « Charitas fraternalis maneat in vobis,  
et hospitalitatem nolite obliuisci (*Hebr. xiii.*) ; » per  
hanc enim placuerunt quidam angelis hospitio rece-  
ptis. Nonnulli sane dum pauperibus Christi januam  
cum visceribus claudunt, furandi crimen objiciunt,  
et dum eis hospitalitatis humanitatem per avaritiam  
subtrahunt, cleptem suspicari, jacturamque rebus  
domesticis se formidare consingunt : modo scilicet  
obesam faciem, modo ora rubentia subsannantes op-  
ponunt, et torosa brachia, robustosque lacertos agri-  
culturae fissionibus idoneos criminantur : Deum, qui  
talibus soliantur, offendere, qui nimur possent  
et alios sui laboris exercitio sustentare. Quibus pro-  
fecto valde formidandum est, quod in Deuteronomio  
per Moysen Israëlitico populo dictum est : « Ammo-  
nites et Moabites etiam post decimam generationem  
non intrabunt in Ecclesiam Domini in æternum, quia  
noluerunt vobis occurrere cum pane et aqua in via,  
quando egressi estis de Ægypto (*Deut. xxiii.*). » Nam  
si gentes illæ legem utique non habentes, idcirco ab  
Ecclesia Dei irrevocabiliter excluduntur, quoniam  
inimicis etiam suis per humanitatis officium occurserunt  
neglexerunt ; quam terribili sententia digni sunt qui  
charitatem fratibus non impendunt ? Hi nimur  
sunt ex sacrosancti baptismatis fonte congeniti, cum  
his ex utero matris Ecclesiae sunt egressi ; et cura  
quibus Dominicæ corporis et sanguinis mensa pa-  
tient, his cibum, qui in secessum digerendas est,  
negant.

Et qua conscientia nos ab eleemosynarum erogi-  
tione torpemus, qui videlicet in ecclesiastica pa-  
quescimus, cum et sancti apostoli, qui adversus

rum mundum fuerant velut in bella congressi, in hujus gratiae studio legantur existisse solliciti? Nam si liceret aliis, illi potuissem non inconvenienter ab hac sollicitudine ferari: qui nimirum et ad spargendum novae sidei semen intenti, et in tam acerrimo contra mundi persidiam laborabant certamine constituti. Sed nullus persecutionis labor ab exhibenda fratibus humanitate compescere, nulla praedicationis instantia potuit eos ab impendenda pauperibus misericordia cohære. Unde Paulus ad Galatas: « Petrus, inquit, et Jacobus, et Joannes, qui videbantur columnæ esse, dextras dederunt mihi, et Barnabæ societatis, ut nos evangelizaremus in gentibus: ipsi autem in circumcisione, tantum ut operum memores essemus: quod etiam sollicitus fui hoc ipsum facere (*Galat. ii.*). » Ad Corinthios quoque dicit: « De collectis autem, quæ sunt in sanctos sicut ordinavi Ecclesiis Galatiæ, ita et vos facite per unam Sabbati: unusquisque vestrum apud se ponat, recondens quod ei bene placuerit, cum autem præsens fuero, quos probaveritis per epistolas, hos mittam perferre gratiam istam in Jerusalem (*I Cor. xvi.*). » Tantaque fuerat erga pauperes in apostolis liberalitas, ut in eorum Actibus legatur: « Qui frangebant **206** circa domos panes, et sumebant cibum cum exultatione et simplicitate cordis collaudantes Dominum (*Act. ii.*). » Circa domos, inquit, non intra domos; quorum scilicet vestigia non sequuntur, qui pransuri pessulos ac repagula, foribus clavis objiciunt, vectes seris innectunt: sive se contra pauperes tanquam adversus circumfusas hostium acies in obsidione præmuniunt.

## CAPUT V.

*Quod parentum eleemosynis filiorum res crescit.*

Gerardus certe de Farvaldo, ex Ravennæ urbis primoribus fuit, quem grandævæ jam et personilis aetatis olim puerulus vidi: de quo nimirum referri frequenter audivi: quia cum aliquando populus inopia laboraret, adeo ut nonnullos etiam valida famæ extingueret, ille cum successura sibi nepotum quoque jam soboles non decesset, accisis fugibus etiam præfia nonnulla distraxit; et alimenta quæ potuit, indigentibus erogavit: ipse quoque tunc patentibus foribus pauperum vallatus agmine comedebat, cibisque consumptis adhuc esuriens, cum vel sibi, vel ille quid adderet non haberet, eorum compassionem Iacrymans flebat: cuius hodieque progenies divitiis floret, et plura, quam avita fuerint patrimonia, possidet.

Walericus præterea, qui dum adversus hæreticos dimicaret, insignis effectus est martyr, sicut Andreas venerabilis Spoletanæ Ecclesiæ nobis episcopus retulit, dum aliquando domum matris inviseret, pauperculum quemdam præ foribus reperit, qui se conquerebatur herbarum fasciculum collegisse, sed sal, unde pulmentum illud condiret, ab eadem matrona percipere nullatenus potuisse. Cumque vir sanctus maternum ingressus hospitium, aliquantulum salis in vasculo reperisset, vehementer iratus, vas cum sale

A corripuit, et per plateam ad matris injuriam sparsit dicens: illud non debere comedи prorsus a Christiano, quod per avaritiam negatum est Christo. Sed paulo post diem vas, quod reposuerat vacuum, non sine stupore miraculi, sale repertum est plenum.

Mansfredus quoque marchio, qui in ultimis Liguriæ principatus est finibus, ferventissimo cum uxore sua studio in sustentatione pauperum claruit: de quo nimirum (ut cætera taceant) illud unum celebre solet redolere memoria: quoniam in ipso sacrosanctæ Resurrectionis die cum domus ejus aulæis ac blathinis ornatis tanquam regale palatum resplenderet, copiosi sumptus affluerent, eumque non modica candidatorum turba clientium constiparet, instrui magnifice convivium fecit, et ordinatis per omnes mensas diligent cura pauperibus, ipse cum suis servis dapifer ministravit: quibus sufficienter impletis, ipse cum suis quod cibum residuum fuerat, quasi privatus accepit: ut Paschalis illa solemnitas in pauperibus émitesceret, patrem familias vero dominus privatæ refectio sustentaret. De quo etiam vir Dei, Dominus n̄s Leo venerabilis eremita, qui per continuum jam sere vicennium in celtula reclusus audivit, hoc insigne perhibuit: quia cum in præsatii marchionis eremo ipse **207** cum nonnullis fratibus habitarét, hanc sibi legem uxori ejus indexerat, ut quocunque sibi necessarium eremitarum nuntius peteret, ipsa protinus aucto senore gerinaret: videlicet cum iste quinque fortassis exigeret solidos, illa decem traderet: cum iste decem, illa yiginti continuo numeraret. Sed quoniam oblitus sum, dubito certe, an hoc ipsum, et alibi forte conscripserim. Verumtamen quod ædificationis est, melius est relationibus iterari, quam per silentium oblicatione deleri. Cum itaque fam largus ad erogandas indigentibus stipes extiterit, cum sex, sive septem, si rite teneo, non minima monasteria in proprii juris possessione considerit, prædiis et ornamenti munifica liberalitate ditaverit, nunquid properea sibi progenies egena succeditur? Absit. Videamus enim nepotes ejus mirandæ scilicet indolis pueros maximam partem etiam regni Burgundiae possidere: quorum insuper soror imperatori nostro sponsali cognoscitur jure dotata. Cur ergo timemus Deo rehibere quod consulit, quod et in hac vita nobis, vel nostris hæredibus restituitur, et in illa cœlestis regni gloria sub senore multiplicatae retributionis augetur?

## CAPUT VI.

*Quod bonorum temporalium affluentia ex eleemosyna oriatur.*

Hoc etiam nosse operæ pretium deputo, quod Berardus marchio, qui horro defunctus est, saepius referebat: aiebat enim, quia vir quidam in Teutonum finibus, unde videlicet ipse quoque oriundus extiterat, optimum proprii juri prædium diversorumque proventuum copiis affluenter uberrimum possidebat; habebat autem duodecim filios: cœpit interea cogitare, quid post ejus obitum fieret, si

unius possessionis hæreditatem inter tot divideret cohaeredes. Dicebat enim : Ego quidem, qui totum hoc solus habeo, sufficienter et pacifice vivo; sed ubi tot divisores emerentur, quis eorum similitates? quis orientia inter illos livoris, et odii jurgia sustinebit? Non enim illic esse poterit unitas voluntatis, ubi tam multifaria fuerit diversitas facultatis. Coloi præterea, qui nunc uni parere domino sunt contenti, non sine gravi suæ quietis injuria tot dominorum populo sunt responsuri. Tibi ergo, Deus omnipotens, quidquid est, mei juris allodium trado, te solum hæredem meæ possessionis eligo; filios autem meos tibi commendo; fac eis quod in oculis tuis beneplacitum fuerit. Et hoc dicto quantum suum sagittæ prolinus alligavit, eamque curvato forlitter arcu, in vasti aeris superiora conjecit. Sed mox sagitta sine guanto in terram relapsa est: ut evidenti monstraretur indicio, quia donum, quod sidei obtulit, clementia divina suscepit. Tunè ille de sui munericis oblatione fidentior, et alacrior factus, possessionem suam cuidam Ecclesiæ tradidit, eamque sibi perpetuo jure per stipulationes ac rata firmavit. Brevi vero post hæc filii ejus tanta bonorum affluentium sunt abundantia prædicti, tot prædiorum ac censum copia sunt magnifice dilatati, ut eorum quisque summam paternæ **208** facultatis excederet, eisque circumflua mundi prosperitas in omnibus arrideret. Sic sic qui investiturum guanti de manu patris in cœlo recepit, super filios ejus imbre suæ benedictionis exuberanter influxit. Quod igitur in terra Deo datur, in cœlo recipitur: et inde sperandum est præmium quo præcessit munus oblatum. Hinc est quod angelus Domini Cornelio dixit: « Orationes tuæ, et eleemosynæ tuæ ascenderunt in memoriam in conspectu Domini. (Act. x). » O felix tale commercium, ubi homo fenerator, et Deus sit omnipotens debitor: et fidenter ei possumus compensationis nostræ debita digna reposcere, si nostris eum satagimus munéribus prævenire.

Nam et tempore Gregorii papæ (ejus nominis sextus), qui Gratianus dicebatur, recolo contigisse quod narro (sicut enim mihi Bonizo, grandævus videlicet vir, rector monasterii sancti Sevéri juxta urbem veterem constituti, retulit). Scotigenarum rex primævo tunc adolescentiæ flore pubescens, quia pater obiit, ei mox in regalis fastigii jura successit; sed cum sollicite consideraret quam fragile sit quidquid in hoc sæculo tumet, quam labile quod supræminet, quam velociter extingibile sit omne quod splendet, cum conjugatus jam esset, decrevit regales insulas regni cœlestis amore deponere; coronam capitio, purpuram cucullam mutare. Quid plura? simul orationis studium, aggreditur expeditionis Romanæ procinctum. Apostolicorum itaque liminum devotione completa, ignorante clientium comitatu, monachicum habitum latenter induit, et sic a se mundum cum regno bene semetipsum suratus alixit: qui mox languore percussus, ad extrema pervenit, et usque ad obitum hoc tanquam federatæ conventionis elogium in clamare non destitit: Domi-

A ne, feci quod præcepisti; adimple quod promisisti. Nimirum in vinea constitutus reposcebat nummum, quia patrisfamilias se neverat implesse præceptum; et licet undecima fuisse hora conductus, exigebat requiem post laborem, et expletæ reposcebat operatione mercedem. Non ergo dubitemus nunc Deovel nos, vel nostra præbere, ut ea postmodum tota valeamus auctoritate reposcere. Et dum comedimus, non compellamus egenos parcus ministrando tanquam sobrios ligurire, dum ipsi turritæ lancis edulium non gravemur absumere: nec eis, sicut a quibusdam sit, cochlearis est adhibenda mensura, cum nobis ollæ, vel cacabi vix sufficiant.

Fulcranus nempe cujusdam Gallicæ regionis episcopus (ut mihi reverendus in Christo Hugo Cluniensis abbas retulit), dum a suo requireretur economo quid sibi parari vellet, aiebat: Juxta numerum convescentium, prout tibi visum fuerit, præpara pro me vero solo porcum optimum, pingue nimis et grandem opipatoribus exhibe, ut ne tenuem quidem lenticulam ex eo quisquam dèbeat absque mea persona gustare. Discubens itaque cum convescentibus ipse pauperibus, totam cum eis omnino victimam consumebat, nec cuiquam præter eos vel minimam carnis officulam porrigebat.

### 209 CAPUT VII.

*Eleemosyna defunctis prodest, dæmonibus invisa.*

Idem mihi sanctus abbas iterum retulit quia vir quidam dum orationis studio diversa mundi loca percurreret, impegit in eremum, ubi sanctus quidam frater in cellula morabatur: qui post aliqua peregrinum subtiliter inquisivit, utrum Cluniacense monasterium nosset. Cui subsequenter et hoc intulit: Quæso te, inquit, per charitatem Dei, frater mi, ut si locum illum venerabilem te fortassis adire contigerit, deponiles fratribus et abbati, quatenus aeleemosynarum studio non tepescant, sed pietatis operibus, sicut assueti sunt, perseveranti constantia vigilanter inferveant. Hic enim gehenna flammis vaporantibus æstuat, et hinc animæ damnatorum, me frequenter audiente, cum magnis ejulatibus, fluctuumque stridoribus merguntur in tartarum: sed orationes et eleemosynæ præsatæ monasterii malignis spiritibus valenter obsistunt, et tanquam prædam ex eorum manibus multos eripiunt. Peregrinus itaque longo post tempore ad monasterium venit, et quæ sibi mandata fuerant, fratribus per ordinem narravit.

Illiud præterea satis indignamur, quod a quibusdam sieri non ambigimus: ut ipsi videlicet innitantur excelsæ mensæ fastigio, pauperes vero qui ab eis aluntur, inter canum greges in nudo resideant pavimento. Illi utantur mantilibus acu variante depictis, istis alimenta ponantur in gremiis. Gothsfredus plane clarissimus dux et marchio mihi perhibuit in propriæ regionis historia contineri, quoniam Carolus imperator quindecim vicibus cum rege Saxonum, qui gentilitatis adhuc detinebatur errore, bellum commisit, quod decies perdidit; trius vero consedit

postmodum præliis Carolus superavit, eumque postmodum captum victor obtinuit. Aliquando sane dum Carolus idem excelsa, ut assolet, inthronizatus arce discumberet, pauperes vero, quos alebat, solotenus ignobiliter residerent, rex qui remota procul ab imperatore mensa prandebat, talia per nuntium legata direxit: *Dum vester, inquit, Christus sese perhibeat in pauperibus recipi, qua fronte persuadetis nostra sibi colla submitti, quem vos ita despiciatis; eique nullam honoris reverentiam exhibetis?* Ad quod imperator corde compunctus erubuit: et ex ore gentilis hominis evangelicam prōdire sententiam vehementer expavit. Ait enim Dominus: « Quod uni ex minimis meis fecistis, mihi fecistis » (*Matth. xxv.*). Lætatus ergo rex dum a tali correptus, utpote qui necdum fidei rudimenta perceperat, jam fidei fructum, misericordiae scilicet opera prædicabat.

Illud præterea summopere notandum est, quia pedes lavare pauperibus saluberrimum est. Unde Dominus ait discipulis: « Si ergo Dominus et magister vester lavi vobis pedes, quanto magis vos debetis alter alierius lavare pedes? » (*Joan. xiii.*) Et ut hoc mandatum fratrio adhuc auctoritate statueret, eorumque mentibus hoc arctius inculcaret, adjecit: « Exemplum enim dedi vobis, ut quemadmodum ego feci, ita et vos **210** faciatis (*Ibid.*). » Nam cum pauperum pedes in ejus qui præcepit devotione lavantur, lavantis profecto et anima simul et corpus a peccatis abluitur. Unde et Petrus ait: « Domine, non tantum pedes meos, sed et manus, et caput (*Ibid.*). » Cur itaque Petrus non alia corporis membra eam pedibus præter manus et caput oblitus, nisi quia per hæc, opera corporis et cogitationes mentis expressit? Caput enim pro mente, manus vero pro toties ponitur corporis actione.

Porro Mainardus venerabilis Sylvæ Candidæ episcopus mihi retulit quia Nicolaus papa, piæ memorie, qui ante triennium ex hac in Domino luce mīgravit, nunquam in toto anno prætermittebat diem, quin pedes duodecim pauperibus semper ablueret. Quod si facere per totum non occurseret diem, lucidum pietatis opus explebat in nocte. Sed quoniam de privilegio misericordiae, et eleemosynarum dignitate plus mihi datur videre quam dicere, in ejus præconium libet breviter exclamare.

D

**ARGUMENTUM.** — Canonicarum horarum originem, et mysteria declarat, earumque utilitates enumerat. Quapropter hortatur virum quicdam nobilem, ad quem hunc libellum mittit, ut canonicas horas audire, aut ipse recitare non negligat, nullisque occupationibus a tam pio opere avocari se patiatur; officium quoque B. Virginis eidem magnopere commendat.

Domino T.... viro clarissimo, Petrus peccator mox eius orationes in Christo.

A **CAPUT VIII.**  
*Laus eleemosynæ.*

O virtus eleemosynæ, quæ velut fluentum fontis irrigui, et peccatorum iniquiamenta detergis, et æstuantium vitiorum flamas extinguis? O felix eleemosyna, quæ de gehennæ barathro tenebrarum filios extrahis, et a loptatos luci perpetuæ regnis cœlestibus introducis! Tu de manibus pauperum volas in cœlum, et illic tuis amatoribus paras hospitium. Si vinum es, non coacescis; si panis, non emittis mucorem; si caro, vel pisces, non verteris in putredinem; si vestis præterea, nullam contrahis vetustatem: recens jugiter servaris et nova, et mox ut tuus oblator obierit, ad eum illico multiplicata reverteris. Tu de jacentibus sub criminum squalore conspicuos; tu de damnabilibus sanctos, tu facis de gentilibus Christianos. Quod nimur Cornelius probat, cuius eleemosynæ ad divini conspectus culmen ascenderant (*Act. x.*).

B O dives eleemosyna, quæ tuis amatoribus præoes hereditatem immarcescibilem, et cœlestis curia dignitatem! O miranda misericordiae virtus, quæ peccatorum omnium rubiginem purgat, frenementum vitiorum incitamenta mortificat, et splendore cœlestis gratiae tenebrosas hominum mentes illustrat! Hæc Deum facit hominibus debitorem, ut regnum sibi cœlorum non jam quasi quod alienum est, querant: sed vel uti quod sui juris est, audacter invadant. O felix misericordia, quæ de miseria quidem nasceris, sed veram tuis executoribus beatitudinem paris! Tu negotatrix omni mangone prudentior, que terrenis mercibus cœlestia comparas, et transitoriis æterna permutas. Felices mundinæ tue, in quibus datur hospitium, suscipitur habitaculum, præbetur panis exiguis, recipitur regnum, porrigitur numerus, comparatur aula cœlorum.

C Inter cæteras ergo virtutes, venerabilis frater, quibus sanctitatis tuae non ambigimus florere prudenter, hanc specialiter arripe, in operibus te pietatis exerce, misericordiae semper visceribus afflue: ut qui nunc Christi pauperibus misereris, a Christo postmodum misericordiam consequaris.

*Sit nomen Domini benedictum.*

## 211-212 OPUSCULUM DECIMUM.

### DE HORIS CANONICIS. AD T.... VIRUM CLARISSIMUM.

Dam tecum, dilectissime, in episcopali Ravennæ palatio colloquens, nonnulla tibi vivendi præcepta